

Dia 26 di juli ta Dia Internacional di Mangel

ORANJESTAD - UNESCO a proclama 26 di juli Dia internacional di Mangel pa Conservacion Ecosystema.

Henter mundo mester ta na altura di e Mangelnan cu ta crece canto di lama cu nan balornan ta imenso pa e ser humano, pa bestia, parha y tur flora y fauna bou y den awa y pa nos medio ambiente. Ta un tristesa cu aki na Aruba ta kima y destrui e mangelnan. Ainda nos ta maltrata nos mondi di mangel.

Unda cu tin clima Tropical y Sub-tropical mangelnan ta crece. Si wak potretnan di 1900 bo ta mira cu riba cay antes tabatin mangel. Tambe den

bahianan unda cu awa di rooi ta topa cu lama mangel ta crece. Reisnan ta hancra den tera of lodo. Riba tera por weita canto di e reisnan cu ta yen di buraco. Aki ta biba cangreu, yuwana y otro bestia. Reis di Mangel Preto ta hancra den lodo, e por hala rosea dor di saca un snorkel cu ta pasa riba e lodo pa por sobrevivi. Nos ta yama e reisnan cu ta teha den otro cuna di pisca, nan ta proteha pisca chikitonan cu ta biba den nan medio ambiente. E mangel Tam por crece te na un altura di 8 te 10 m. Tin reisnan ta colga for di e palo bin te den awa of lodo pa hancra su mes. Den temporada di horcan cu lama halto y biento fuerte e mangelnan ta wanta tur e fugada di



e horcan. Reis di mangel ta masha fuerte, e ta hundo pega den fondo di lama. Tsunami no ta ranca mangel facil, olanan halto ta pasa den e mangelnan y e reisnan fuerte ta kibra e olanan. Pueblo di Aruba mester cuida nos mangelnan, nan ta baricada pa ora di horcan. Casi tur mangel ta crece na banda zuid di nos isla. Aki ta e destruccion di mas grandi di Mangelnan. Den marduga a kima mangel y boto, hende a destrui, nan a kima, nan a kap na Spaans Lagoenweg. Despues di 6 aña ainda e no a recupera, hopi daño haci den scuridad. Pakiko nos no ta aprecia loke nos a haya di regalo. Luna pasa otro destruccion na Pos Chikito. Pabou di dom otro destruccion patras di aeropuerto, destruccion y susha cu azeta di moter di boto. Otro ta cuida y otro ta descuida mangelnan. Den Spaans Lagoen bou di e brug ta un berguensa, con ta duna un compania di construccion stranhero permiso pa destrui nos mangelnan. Tabata necesario tanto destruccion?. Aki a perde casi tur fauna di awa, bou di e brug casi tur cleconchi (pega riba piedra) y flora cu ta limpia e awa. Por a salba algun si tabata di bon curason. Aruba tin poco espacio pa mangel, asina mes nos ta contento cu tin diferente sorto di mangel. Den Spaans Lagoen tin 4 sorto. Nos ta bendiciona cu esey. Un luga pa reflexiona den tur tranquilidad. Pasamento di clubnan di bicicleta ta prohibi. Ta spanta parha y otro fauna a haci cu a condena e luga precioso aki. Alcontrario cu na Boneiro nan ta invita pueblo pa bin cana y tin Mangrove tours by kajak y solar boat, pa haci un trip den e Mangelnan, hende responsabel ta organisa e dia di Mangel.

Stimaruba tambe ta invita tur interesado pa bin cana un rato. For di e ruina di Spaans Lagoen ta cuminsa pa 4.30or di atardi. Tin informacion di e 4 mangel riba un brochure. Por tin un poco ashibi, parti atardi. Hunta curpa cu algo. Duracion 1.30 min. Tur hende ta bon bini, (no cu cacho). No lubida cu bin cu awa pa bebe. Tin solo y ta haci calor, ta rekeri pa bisti sapato.